

Dette tener ordførarane og rådmennene i Nordhordland og Gulen.

Lønnsvinnaren blant rådmennene er Lindås-rådmann Ørjan Raknes Forthun med ei årsløn på 1.310.000 kroner. Han har elles fått jobben med å styra dei tre kommunane Lindås, Meland og Radøy saman til Alver, ei samanslåing som skal vera på plass 1. januar 2020.

På 2. plass kjem Meland-rådmann Martin W. Kulild med 1.200.000 kroner, og på ein god 3. plass kjem Gulen-rådmann Reidun Halland med 1.156.500 kroner.

I den andre enden av skalaen finn me tre rådmenn som framleis ligg under ein million i bruttoinntekt; Austrheim-rådmann Jan Olav Osen, Modal-rådmann Jo Tømmerbakke og Masfjord-rådmann Svein Helge Hofslundsengen. Osen ligg lågast med 840.000 kroner, men så er heller ikkje løna hans regulert for 2017 enno.



LØNSVINNARAR: Meland-rådmann Martin W. Kulild og Lindås-rådmann Ørjan Forthun er dei to best betalte rådmennene.
KETIL TJORE

Lindås:

Ordførar Astrid Aarhus Byrknes: **1.097.383 kroner**

Rådmann Ørjan Forthun: **1.310.000 kroner**

Ass.rådmann Hogne Haugsdal: 873.000 kroner



MEST GODTGJERSLE: Ordfører i Lindås, Astrid Aarhus Byrknes tener 168.781 kroner meir enn ein stortingsrepresentant.
Arkivfoto


Av ordførarane er det Lindås-ordførar Astrid Aarhus Byrknes som tener mest. Med ei årleg godtgjersle på 1.097.383 kroner, tener ho 168.781 kroner eller 21 prosent meir enn ein stortingsrepresentant.

Godtgjersla til ordføraren vart vedtatt i kommunestyret i november i fjor.

– Ein del av godtgjerslene hang att etter gamal tid, så etter valet i 2015 vart det sett ned ei arbeidsgruppe som jobba med politisk styringsstruktur og reglement. Det var på tide med ei totalopprydding, seier varaordførar Nina Bognøy.

Ho forklarar at ordførargodtgjersla før var lik løna til rådmannen, men i og med at det har skjedd mykje med rådmannslønningane generelt dei siste åra, var det naturleg å forlata dette prinsippet.

– Med ei godtgjersle på ein fast prosent i forhold til det stortingsrepresentantane tener, regulerer løna seg sjølv og kommunestyret slepp å ta stilling til det kvar gong, seier Bognøy.



Som stortingsrepresentantane

Å følgja stortingsrepresentantane si løn er også blitt vanleg i dei andre kommunane. På den måten blir det ein slags automatikk i

lønsutviklinga for ordførarar og ein slepp å lura på kor ein skal leggja lista.



GODT BETALT: Ordførar i Austrheim Per Lerøy har same godtgjersle som ein stortingsrepresentant.
Gunn Berit Wiik Berg

Austrheim:

Ordførar Per Lerøy: **928.602 kroner** (*Denne er lik godtgjersla til stortingsrepresentantane og vert regulert av Stortinget i juni kvart år*)

Rådmann Jan Olav Osen: **840.000 kroner** (*Ikkje regulert for 2017 enno*)

Ass. rådmann Olav Mongstad: **795.000 kroner** (*Ikkje regulert for 2017 enno*)

Lønna til rådmann og assisterande rådmann i Austrheim er ikkje regulert enno i 2017. Her er rutinane at desse lønningane først vert regulerte når kommuneoppgjeret med dei lokale forhandlingane er avslutta. Lønstillegga vil bli gitt med verknad frå 1. mai i oppgjersåret, altså det tillegget ein får på slutten av 2017 får verknad frå 1. mai 2017, forklarar ordførar Per Lerøy.

Dei fleste ordførarane våre tener det same som stortingsrepresentantane eller 90 prosent av godtgjersla deira. Unntaket er Modal-ordføraren som tener 75 prosent av det stortingsrepresentantane gjer og Fedje-ordføraren som tener 92,2 prosent av det stortingsrepresentantane gjer.

Modalen-ordføraren tener minst

Modal-ordførar Tom Kristian Thorsen er dermed den av ordførarane som med si årsløn på 696.452 kroner tener minst. På nest siste plass kjem Gulen-ordførar Hallvard Oppedal med ei bruttoløn på 789.312 kroner.

I somme tilfelle er godtgjersla avhengig av om vedkommande jobbar heil- eller deltid for ordførar.



LITT MINDRE: Ordfører i Radøy, Jon Askeland tener 90% av stortingsrepresentantane si godtgjersle.
Gunn Berit Wiik Berg

Radøy:

Ordfører Jon Askeland: **835.742 kroner** (90% av stortingsrepresentantane si godtgjersle).

Rådmann Jarle Landås: **1.030.000 kroner** (Dette er etter årets lønsregulering.)

Ass. rådmann: Radøy har ikkje ass.rådmann.

Får ikkje feriepengar

Tanken bak alle former for fastsetjing av godtgjersla er at det blir føreseielege vilkår for ordføraren.

Ordførarar har nemleg ikkje rett til feriepenger slik vanlege lønsmottakarar, men får godtgjersle som andre folkevalde. Dette inneber at ordførarar får årsgodtgjersle fordelt som 12 like månadsgodtgjersler. Skal folkevalde få feriepengar på linje med arbeidstakarar, må kommunestyret ifølgje kommunesektorens organisasjon KS fatta særskilt vedtak om dette.



Meland-ordfører Øyvind Oddekalv har same godgjersle som ein stortingsrepresentant.
Gunn Berit Wiik Berg

Meland:

Ordfører Øyvind Oddekalv: **928.602 kroner** (*som stortingsrepresentant*)

Rådmann Martin W. Kulild: **1.200.000 kroner**

Ass. rådmann: Meland kommune har ikkje ass. rådmann. Personal- og organisasjonssjef er rådmannen sin avløyssar, men dei har ingen med tittelen assisterande rådmann.



LØNSHOPP: Rådmann i Fedje, Ingebjørg Vamråk fekk i oktober eit lønshopp frå 850.000 til 1.100.000 kroner. Ho begynte som rådmann på Fedje 18. juli 2016.
Privat

Fedje:

Ordførar Stian Herøy: **856.775 kroner** (92,2 % av stortingspolitikarane si godtgjersle).

Rådmann Ingebjørg Vamråk: **1.100.000 kroner**

Ass. rådmann: Har ikkje lenger.



Masfjord-ordfører Karstein Totland tener 90 prosent av det ein stortingsrepresentant gjer.
KETIL TJORE

Masfjorden:

Ordførar Karstein Totland: **835.742 kroner** (90% av stortingsrepresentantane si godtgjersle).

Rådmann Svein Helge Hofslundsengen: **995.000 kroner**

Ass. rådmann Sveinung Toft: **789.000 kroner**



NEST MINST: Gulen-ordførar Hallvard Oppedal er med si godtgjersle på 789.312 kroner, den av ordførarane som tener nest minst.

Gulen:

Ordførar Hallvard Oppedal: **789.312 kroner**

Rådmann Reidun Halland: **1.156.500 kroner** (*Løna til rådmannen er ikkje justert i 2017 – dette vil bli gjort før desemberløn.*)

Ass. rådmann Harald Haugejorden: **750.500 kroner**

Jobbskifte gir høgare løn

Rådmannen si løn blir ofte fastsett basert på storleiken på kommunen. Jo fleire innbyggjarar, jo høgare løn.

Men mange rådmenn i mindre distriktskommunar har i praksis ikkje noko pressmiddel i lønsforhandlingar. I mange småkommunar er det heller ikkje reelle forhandlingar om rådmannen si lønn. Det einaste pressmiddelet då, er å få seg ein annan jobb.

Lang praksis har liten innverknad på løna. Årsakene til dette kan ifølgje KS vera at løna blir sett opp ved nyrekruttering.



Rådmann i Modalen, Jo Tømmerbakke tener 950.000 kroner i året.
SILJE ALVSAKER

Modalen:

Ordførar Tom Kristian Thorsen: **696.452 kroner** (75% av stortingspolitikarane si godtgjersle) **Rådmann** Jo Tømmerbakke: **950.000 kroner** **Ass. rådmann** Oddvin Neset **745.000 kroner** (Ove Sæbø overtar som ass. rådmann 1. desember)

Stadig fleire byter kommunar

I ein statistikk frå KS kjem det fram at i seksårsperioden 1992 til 1998 hadde totalt 14 prosent av rådmennene bytt kommune, 11 prosent til ein større kommune og 3 prosent til ein mindre kommune.

I dei påfølgjande seksårsperiodane ser ein at stadig fleire rådmenn byter kommune. Dette gjeld både dei som går til ein større kommune, og dei som går til ein mindre kommune.

I perioden frå 2010 til 2016 hadde 24 prosent av rådmennene bytt kommune, 16 prosent til ein større kommune og 8 prosent til ein mindre kommune.